

Borgmesterinut taakkulu aappaannut meeraannullu pensionisiaqartitsineq pillugu Namminersorlutik Oqartussat nalunaarutaat nr. 24, 30. december 2013-imeersoq

Kommunit aqunneqarnerat pillugu Inatsisartut inatsisaat nr. 22, 18. november 2010-meersoq, Inatsisartullu inatsisaatigut nr. 6, 29. november 2013-imeersutigut allanngortinneqartumi § 67a, imm. 1, malillugu aalajangersarneqarpoq:

§ 1. Inuk 1. maj 2013 sioqqullugu borgmesteritut sulisoq nammineq pensionisianik pisinnaatitaavoq §§ 2-6-imi malittarisassat malillugit. Tamanna aamma atuuppoq inummut Kommunit aqunneqarnerat pillugu Inatsisartut inatsisaanni § 67a, imm. 3 malillugu §§ 2-6-imi malittarisassanut ilanngunneqarnissamik toqqaasimasumut.

Imm. 2. §§ 2-4-mi malittarisassat atornerarpata piffissat inuup §§ 10 aamma 11-mi malittarisassanut ilanngunneqartut ilanngunneqarfigisai isigineqassanngillat.

Imm. 3. Inuup aapparisa meeraaluunniit imm. 1-imut ilanngunneqartut § 7-imi malittarisassat malillugit aappaasumut meeraasumullu pensionisianik tunineqartussaapput.

Nammineq pensionisiat

§ 2. Borgmesteriusimasumut nammineq pensionisiat pineqartup pensionisiaqalernissamut ukiui borgmesteritullu sulinermit soraarnermi pensionisiaqaatigalugit akissarsiai malillugit aalajangersarneqarput.

§ 3. Nammineq pensionisianik tunniussinermi ikinnerpaamik ukiuni 8-ni atuuffeqarsimanissaq piumasarineqarpoq, taamaattoq takuuk imm. 4.

Imm. 2. Atuuffiusimasoq tassaavoq atuuffik pineqartup borgmesteritut suliffigisimasaa. Borgmesteritut sulinermi arlalinni atuuffiit katinneqassapput.

Imm. 3. Atuuffiusimasoq ukiunut ilivitsunut ukiunullu atuuffinnut aallartittunut naatsorsorneqarpoq.

Stk. 4. Borgmesteri napparsimaneq, nakorsap uppersaanaeratigut borgmesteritut suliap isumaginissaanut akornutaasoq pissutigalugit kommunalbestyrelsimit akuerineqarluni atorfimminit tunuarpat atuuffiusimasoq qinigaaffik tamakkerlugu tunuarnissap tungaanut ilanngullugu naatsorsorneqassaaq.

§ 4. Borgmesterip pensionisiaqalernissaanut ukiui borgmesteritut atuuffia malillugu naatsorsorneqassaaq imaalillugu:

Atuuffik

Pensionisiaqalernissamut ukiut

Ukiut 8-nit 10-nut naatsorsorneqassapput.....	ukiunut 28-nut
Ukiut 10-nit 12-nut naatsorsorneqassapput.....	ukiunut 30-nut
Ukiut 12-nit 14-inut naatsorsorneqassapput.....	ukiunut 31-nut
Ukiut 14-init 16-inut naatsorsorneqassapput.....	ukiunut 33-nut
Ukiut 16-init 18-inut naatsorsorneqassapput.....	ukiunut 34-nut
Ukiut 18-init 20-nut naatsorsorneqassapput.....	ukiunut 36-nut
Ukiut 20-nit qummut naatsorneqassapput.....	ukiunut 37-nut

§ 5. Nammineq pensionisianik tunniussineq aallartissaaq siusinnerusukkut borgmesteriusimasoq 60-inik ukioqalerpat, borgmesteritullu sulinerminut ilaasortaajunnaarnersiutininik tunineqartarunnaarpat.

Imm. 2. Pensionisianik tunniussisarneq unitsikkallarneqartarpoq pineqartoq borgmesteritut qinerneqaqqissimappat.

§ 6. Nammineq pensionisiat Kalaallit Nunaanni tjenestemandinut malittarisassat atuuttut malillugit tunniunneqarfianni naatsorsorneqarlutillu akinut iluarsineqartarput.

Aappaasumut meeraasumullu pensionisiat

§ 7. Aappaasumut meeraasumullu pensionisiat Kalaallit Nunaanni tjenestemandinut malittarisassat atuuttut malillugit tunniunneqartarput.

Imm. 2. Taamaattoq aappaasoq aappaasumut pensionisianik nalunaarut manna malillugu pisinnaajuassaaq, borgmesteritut sulinerup kingornagut katissimagaluarpalluunniit. Assinganik meeqqat meeqqanut pensionisianik pisinnaatitaapput, borgmesteritut sulinerup kingornagut inunngorsimagaluarpataluunniit.

Pensionisiat il.il. naatsorsornerat tunniunneqarnerallu

§ 8. Pensionisiat nalunaarut manna naapertorlugu imaluunniit borgmesterinut taakkuluunniit aappaannut meeraannullu pensionisiaqartitsineq pillugu malittarisassat atuuttut malillugit tunniunneqartut naatsorsornerat tunniunneqarnerallu kommunalbestyrelsimit kommunimi siusinnerusukkut borgmesterip kingullermik borgmesteritut suliffigisimasaani isumagineqarput.

Imm. 2. 1. januar 2009 tikillugu borgmesteri kommunimi borgmesteritut suliffeqarsimappat kommunimi kingullertut suliffigisimasami kommunalbestyrelsi borgmesteriusimasumut imaluunniit taassuma aappaanut meeraanullu pensionisiassanik naatsorsuissaaq tunniussillunilu.

§ 9. Borgmesteritut nammineq pensionisiat kommunimut ataasiinnaanngitsumut tunngassuteqartut kommuninit pineqartunit tapitit tunniunneqassapput. Tamanna aamma atuuppoq aappaasumut meeraasunullu pensionisiat una nalunaarut malillugu tunniunneqartartussat.

§ 10. Inunnut 1. maj 2013-mi kingusinnerusukkulluunniit borgmesteritut sulilersunut aamma Kommunit aqunneqarnerat pillugu Inatsisartut inatsisaanni § 67a, imm. 3 malillugu uani nalunaarummi §§ 2-6-imi malittarisassanut ilanngunneqarumanatik toqqaasimasunut pensionisianut aningaasaateqarfimmik naafferartumik pensionisiat imaluunniit inuuneq naallugu pensionisiat aqutigalugit Kalaallit Nunaanni nalunaarsorsimasumik inummut namminermut pensionisianut aaqqissuussinermik pilersitsisoqassaaq.

Imm. 2. Pensionisianut aaqqissuussinerit, tak. imm. 1, pensionisianut aningaasaateqarfimmi Inatsisartuni Naalakkersuisunilu ilaasortatut sulinermut atatillugu inummut namminermut pensionisianut aaqqissuussinernut atorneqartartumi pilersinneqassapput.

Imm. 3. Akissarsiat borgmesteritut sulinerup isumagineranut tunniunneqartartut 10 %-iini imm. 1-imi pensionisianut aaqqissuussinermut taaneqartumut pensionisianut tapiissutinik ingerlaavartumik tunniussisoqartarpoq. Aammattaaq akissarsiat borgmesteritut sulinerup isumagineranut tunniunneqartartut 5 %-iini ingerlaavartumik uninngatitsisoqartarpoq. Aningaasat uninngatinneqartut borgmesterip nammineerluni imm. 1-imi pensionisianut aaqqissuussinermut taaneqartumut tapiissutigisartagaanut naapertuupput. Pensionisianut tapiissutit borgmesteritut sulinerup tunuarnerup kingorna ilaasortaajunnaarnerisutitut tunniunneqartartut assigalugit tunniunneqarlutillu uninngatinneqartarput.

Imm. 4. Inunnut imm. 1-mut ilanngunneqartunut kingusinnerpaamillu ullormi borgmesteritut sulilernerup 50-inik ukioqalersimasunut pensionisianut tapiissutinik imm. 3-mi taaneqartunik nalinginnaasumik aningaasarsiatut akileraruteqaataasussanik tunineqarnissi toqqarsinnaavaa.

§ 11. Kommunalbestyrelsip nakkutigissavaa borgmesterip § 10, imm. 1 malillugu pensionisianut aaqqissuussinermik pilersitsinissaa. Pensionisianut aaqqissuussineq ulloq borgmesterip suliffimmi atuutilerfia aallarnerfigalugu pilersinneqassaaq. Taamatuttaaq borgmesterinut ulloq 1. maj 2013-imi imaluunniit kingusinnerusukkut suliffimmi atuutilersunut, pensionisianut aaqqissuussinerit siusinnerpaamik 1. januar 2014 aallarnerfigalugu pilersitsisoqassaaq.

Imm. 2. Borgmesterimut pensionisianut aaqqissuussineq pilersinneqarpat pensionisianut tapiissutit pensionisianut aningaasaateqarfimmut akilerneqarnissaat kommunalbestyrelsimit isumagineqassaaq, tak. § 10, imm. 3. Borgmesteritut sulinerup isumagineranut akissarsiat tunniunnerat peqatigalugu qaammatikkaartumik tunniussisoqartassaaq.

Atortuulersitsinermut aalajangersakkat

§ 12. Nalunaarut 1. januar 2014-imi atuutilerpoq.

Imm. 2. Peqataanik Borgmesterit pensionisiat soraarnerussutisiaallu qinigaajunnaarnerisutaallu aammalu taakkua aappaasa meeraasalu taakkuninnga pissarsinnaaneri pillugit Namminersorlutik Oqartussat nalunaarutaat nr. 8, 24. maj 2012-imeersoq atorunnaarsinneqarpoq.

Vittus Qujaukitsoq

/

Peter Hansen